

# „Wäntele“ Info !



Ussgoob 1 / 2011

Basel, im Maie 2011

Liebi Käller Wäntele

Mit däären erschten Ussgoob vo dr „Wäntele“ Info ! mecht dr Zumpftroot dr Informazioonsfluss verbessern und au anderer Sache vrselle, wo kennte vo Inträsse sii!

\*\*\*\*\*

E ganz famoos Joor stoot is bivoor, waas d Yyloadigen aageen, wo mr bikoo hänn und au no bikoo wärde!

## **Basel Tattoo Parade 2011 / 23. Juli 2011**

Vo dr Basel Tattoo Productions GmbH hänn mr d Yyloadig bikoo, an dr Basel Tattoo Parade vom 23. Juli 2011 mit z mache. Nääbe de Repräsentazioonsorchester uss dr ganze Wält, wie zem Byspiil

- Band of HM Coldstream Guards, GB
- Band of the Australian Army Band Corps, AUS
- Heeresmusikkorps 10 Ulm, DE
- Swedisch Army Band, S
- Swiss Army Central Band, CH

ooder de Pipebands uss Australie, Dytchland, Grossbritannien, Südafrika und den USA, darf au d Basler Källerwäntele Zumpft an dämm Stadteraignis mitmache.

Vo den Organisadoore hänn mr die erschten Informazioone bikoo und zwoor, ass

1. die Parade am zwai z Midaag aafange duet
2. ass ejeede Dailnäamer in dr Tattoo Street e Midaagässe bikunnt und
3. ass noo dr Parade gniegend Gedrängg in dr Arena und in dr Castbar voorhande sinn.

Mee Informazioone wärde mr esoo ebben imene Mooned bikoo. Mr dien drnoo rächtzytig wiider informiere!

S wäär nadyyrilig scheen, wenn alli Wäntele kennten an dääre Parade mitmache und ass mr is Stolz kennen im Basler Publikum präsentiere.

An dr Broob vom **25. Maie 2011** kaa me sich bim Doris Walser fir die Parade yydraage! S wird kai Lischten ummegää, me muess sich bim Walsi noo dr Broob mäldel!

## **Bergheim Fête du Gewurztraminer / 31. Juli 2011**

Doo het is s Walsi au aagmäldet. S gseet esoo uss, ass mr am 31. Juli 2011 ins Elsass ans Gwürztraminerfescht geen. Au doo gits schpeeter no mee Informazioone. Aamälde duet me sich au am **25. Maie 2011** bim Walsi.

## **Daag vo de Basler Stadtdoor / 20. Augschte 2011**

Wie ejeedes Joor wird am erschte Samschtig no de groosse Schuelferie dr Daag vo de Basler Stadtdoor duuregfiert. Dr Zumpftroot isch biraits draa, däa Daag z organisiere. Mr hänn d Idee, ass mr daas Joor bimenen andere Stadtdoor dien ablaufe, aaber daas muess no brezyys abklärt wärde. Doo wäärde drnoo au zer rächte Zyt d Informazioone koo.

Au fir d Basler Stadtdoor kaa me sich an dr Broob vom **25. Maie 2011** biraits bim Walsi aamälde!

## Ribeauvillé / 4. Sebämber 2011

Fir Ribeauvillé hänn mr is aagmäldet, aaber wie s esoo isch mit den Elsässer, no kai Beschätigung bikoo, ob d Wäntele ins <2011 Sujet> vo Ribeauvillé dien ynebasse. S isch jo sunneklar, ass dr Zumpftroot am Ball blybt und so schnäll als meeglig duet informiere.

S Walsi wäär froo, wenn me scho im Vooruss weiss, wäär wurd mitkoo. Doorum kaa me sich an dr Broob vom **25. Maie 2011** au fir Ribeauvillé scho aamälde!

## Minche / 17. + 18. Sebämber 2011

Sicher s <Highlight> vom Joor, aaber au e groossi Uffgoob fir Alli, isch doch dr Drachte- und Schützenumzug am Sunntig non em „O'zopft is“ siibe (7) Kilometer lang und mr mien ooni Pause duurelaufe!

Dr Zumpftroot het sich biraits mit de baiden Instruggdoore und mit em Pfyffer- und Dambuurechef droffen und s Repertoire, d lebigsstunde und d Marschiebige feschtglait.

## S Repertoire fir s Tattoo / Daag vo de Stadtdoor / Ribeauvillé + oder Bergheim + Minche

S Repertoire gseet esoo uss:

- San Carlo
- Arabi
- Wettstaimarsch (als Pfiffersolo)
- Zofinger Marsch
- Basler Marsch
- Drummelmarsch (in 4x8 resp. 16. Takt)
  
- Unggle Sam
- Pfifferday
- Retraite
- Saggodo
- Epinal (Drummelsolo, 1. bis 4. Värs)

und drnoo goot alles wiider vo Voorne loos!

## Zuesätzligi lebigsstunde + Marschiebige

Daas mr an dr Basel Tattoo Parade und in Minche e gueti Falle mache, het men an dääre Sitzig **zuesätzligi lebigssaate** feschtglait:

- **08. / 15. / 22. / Juni 2011 als Zuesätzligi**
- **und die normal lebigsstund vom 29. Juni im Rääbhuus**

Die zuesätzlige lebigsstunde vom 08. / 15. / und 22. Juni feen wie gwoont **phinggtlig am ahti z Ooben** aa und mr derfe s Gaschträcht vo dr **JB Clique Santihans** in Aaspruch nää.

S Cliquelokal befindet sich am Egge vo dr Milhuuserstrooss / Davisboodestrooss, nääbe dr Gaartewirtschaft vom Restorant Nordbaanhof! Derte kenne mr drnoo au ebbis konsumiere!

Will mr an dr Basel Tattoo Parade und in Minche in 4er Raie laufe dien (mien) und e rassige Schritt uff d Strooss mien aaneleeege, gits non e baar **Marschiebige**:

➤ **06. / 13. / 20. Juli 2011**

Wo die drey Marschiebige sinn, duet dr Zumpftroot no abklääre und Allne rächtzytig bikannt gää.

Mr hänn au mit em Dambuuren- und Pfifferchef abgmacht, ass d **lebigsstund vom 27. Juli nit stattfinde duet**, aaber ass vellicht am 31. Augschte, ganz no Bedarf, e letschti Marschiebig fir Minche kennt organisiert wärde. Au doo bikunnt me no gnau Informazioone.

E ganz **wichtig Datum** wo me sott in Kaländer schrybe, isch dr

➤ **Mittwuche 14. Sebتمبر 2011**

Derte duet dr Zumpftroot iiber Minchen informiere. Woo und wenn däa Orientierigsoobe isch, duet dr Zumpftroot zytig saage.

## **Dr Zumpftroot**

S git e huffe z due und z organisiere. Dr Zumpftroot isch draa, ass die <Events> dr Hammer wärden und mr Alli dr Blausch hänn und no lang driiber schwätze dien!

## **Ruggblig**

Dr erscht „Event“ wo d Wäntele kaa hänn, isch s Drummle Bummle vom 8. Abrille 2011 in Ziiri gsii, E stattligi Azaal vo Wäntele sinn mit em Bus no Ziiri gfaare und hänn derten im Niiderdorf zerscht gmainsam z Nacht gässe. Drnoo sinn mr mit em rassige Repertoire pfyffend und ruessend duur s Niiderdorf bis zem Zwirbel gloffe. No de Daarbietige vo den andere Gruppe sinn mr drnoo imene Gwaltszuug mit den andere Basler Pfyffer und Dambuure noonemool duur s Niiderdorf zooge! S het gruesst und piffe, s isch e woori Fraid gsii.

S isch e scheeni Sach gsi und mr hänn d Gläägehait phaggt, uns no dr Fasnacht wiider uff s Wäntelejoor yyzschimme. S wäär scheen, wenn s nэгgscht Joor non e baar mee wurde mitkoo!

Soo, liebi Wäntele, daas wäär die erscht Ussgoob vo dr „**Wäntele**“ **Info** ! Mr wäärden is Mie gää, regelmässig e soonen Info uuse z gää, ass allewyl alli Wäntele uff em glyyche Wissensstand sinn.

Adie zämme hänn s Guet und bis zem nэгgschte Mool!

Dr Zumpftroot